

## KHUTBAH JUMAAT

### "TUAN YANG TERUTAMA YANG DI-PERTUA NEGERI TONGGAK PEMBANGUNAN DAN KEHARMONIAN NEGERI" (8 Oktober 2021M/ 01 Rabiulawal 1443H)

---

الْحَمْدُ لِلَّهِ، الْحَمْدُ لِلَّهِ الَّذِي خَلَقَ الْإِنْسَانَ فِي أَحْسَنِ تَقْوِيمٍ، وَأَمَرَنَا  
بِالتَّقْوَى وَالْخُلُقِ الْكَرِيمِ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،  
وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا  
مُحَمَّدٍ وَعَلَى آلِهِ وَصَحْبِهِ أَجْمَعِينَ.  
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، أَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ  
الْمُتَّقُونَ.

#### **Kaum muslimin yang dirahmati Allah,**

Marilah kita bersama-sama mempertingkatkan keimanan dan ketakwaan kepada Allah *subhanahu wata'ala* dengan bersungguh-sungguh melaksanakan segala suruhan-Nya dan menjauhi larangan-Nya. Mudah-mudahan dengan keimanan dan ketakwaan, kita beroleh rahmat dan keredhaan hidup di dunia dan di akhirat. Sempena dengan sambutan rasmi Hari Jadi Tuan Yang Terutama Yang di-Pertua Negeri Sarawak, pada 9 Oktober 2021, maka tajuk khutbah pada hari ini ialah " ***Tuan Yang Terutama Yang di-Pertua Negeri Tonggak Pembangunan Dan Keharmonian Negeri*** " .

#### **Kaum muslimin yang dirahmati Allah,**

Secara fitrahnya, manusia perlu kepada peraturan, undang-undang

mahupun keagamaan yang lazimnya disatukan di bawah satu kepimpinan yang dipimpin oleh seorang ketua. Oleh yang demikian, kita rakyat Sarawak bersyukur kepada Allah *subhanahu wata'ala* kerana adanya institusi Tuan Yang Terutama Yang di-Pertua Negeri sebagai pemimpin untuk rakyat bernaung dengan nikmat iman dan ukhuwwah yang menekankan persefahaman dan keharmonian sekaligus memayungi rakyat di negeri Sarawak.

### **Kaum muslimin yang dirahmati Allah,**

Dalam konteks masyarakat di negeri Sarawak yang berbilang suku kaum dan etnik ini, peranan para pemimpin yang diketuai oleh Tuan Yang Terutama Yang di-Pertua Negeri telah menghasilkan kehidupan yang harmoni tanpa ada sebarang diskriminasi perkauman ke arah membentuk perpaduan bangsa. Ia adalah hasil kebijaksanaan dan keadilan pemimpin dalam mengurus tadbir negeri. Firman Allah dalam Surah an-Nisa', ayat 58 :

﴿ إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَىٰ أَهْلِهَا وَإِذَا حَكَمْتُمْ بَيْنَ النَّاسِ أَنْ تَحْكُمُوا بِالْعَدْلِ ۚ إِنَّ اللَّهَ نِعِمَّا يَعِظُكُمْ بِهِ ۗ إِنَّ اللَّهَ كَانَ سَمِيعًا بَصِيرًا ﴾

**Maksudnya:** *Sesungguhnya Allah menyuruh kamu supaya menyerahkan segala jenis amanah kepada ahlinya (yang berhak menerimanya), dan apabila kamu menjalankan hukum di antara manusia, (Allah menyuruh) kamu menghukum dengan adil. Sesungguhnya Allah dengan (suruhan-Nya) itu memberi pengajaran yang sebaik-baiknya kepada kamu. Sesungguhnya Allah sentiasa Mendengar, lagi sentiasa Melihat.*

Menurut Imam al-Mawardi *rahimahullah* dalam kitabnya *al-Ahkam al-Sultaniyyah*:

“Seorang pemimpin itu hendaklah mempunyai pemikiran tajam untuk menjaga siasah umat, pentadbiran menjamin kemaslahatan, berani, berupaya mempertahankan negara dan berjihad menentang musuh.”

Maka dengan sifat dan nilai keadilan serta kebijaksanaan institusi Tuan Yang Terutama Yang di-Pertua Negeri, telah mencorak pembangunan ummah dan keharmonian negeri serta memacu pembangunan dan kemajuan yang lebih hebat, diredai dan diberkati di sisi Allah *subhanahu wata'ala*.

### **Kaum muslimin yang dirahmati Allah,**

Pembangunan dan kemajuan negeri yang menyeluruh dalam pelbagai aspek kehidupan sama ada ekonomi, sosial, politik dan sebagainya yang dipayungi oleh Tuan Yang Terutama Yang di-Pertua Negeri pastinya akan membawa kepada kemakmuran dan kesejahteraan negeri dan negara. Sebagaimana firman Allah *subhanahu wata'ala* dalam surah al-Baqarah, 126:

وَإِذْ قَالَ إِبْرَاهِيمُ رَبِّ اجْعَلْ هَذَا بَلَدًا ءَامِنًا وَاَرْزُقْ أَهْلَهُ مِنْ الثَّمَرَاتِ مَنْ ءَامَنَ مِنْهُمْ بِاللَّهِ وَالْيَوْمِ الْآخِرِ ۖ قَالَ وَمَنْ كَفَرَ فَأُمْتِّعُهُ قَلِيلًا ثُمَّ أَضْطَرُّهُ إِلَىٰ عَذَابِ النَّارِ ۖ وَبِئْسَ الْمَصِيرُ

**Maksudnya:** Dan (ingatlah) ketika Nabi Ibrahim berdoa dengan

*berkata: "Wahai Tuhanku! Jadikanlah (negeri Makkah) ini, negeri yang aman sentosa, dan berikanlah rezeki dari berbagai jenis buah-buahan kepada penduduknya, iaitu orang-orang yang beriman kepada Allah dan hari akhirat di antara mereka". Allah berfirman:" (Permohonanmu itu diterima) tetapi sesiapa yang kufur dan ingkar maka Aku akan beri juga ia bersenang-senang menikmati rezeki itu bagi sementara (di dunia), kemudian Aku memaksanya (dengan menyeretnya) ke azab neraka, dan (itulah) seburuk-buruk tempat kembali"..*

Hal ini jelas, menunjukkan kedudukan institusi Tuan Yang Terutama Yang di-Pertua Negeri telah memperkasa kekuatan bagi menganjak pembangunan ummah yang seimbang antara duniawi dan ukhrawi dalam pelbagai segi; pembangunan manusia, akal budi, akhlak, agama, dakwah Islam dan juga pembangunan material.

### **Kaum muslimin yang dirahmati Allah,**

Saidina Umar bin al-Khattab *radiallahu anhu* pernah berkata:

*"Tidak ada kejayaan melainkan dengan kekuatan. Tidak ada kekuatan kecuali perpaduan. Tiada perpaduan melainkan dengan keutamaan budi (akhlak mulia). Tidak terdapat keutamaan budi (akhlak mulia) kecuali dalam ajaran agama dan tidak ada agama kecuali dengan dakwah".*

Justeru, sebagai rakyat, kita perlu memastikan perpaduan terjaga di kalangan masyarakat yang berbilang bangsa dan agama di bawah kepimpinan Tuan Yang Terutama Yang di-Pertua Negeri membina

kekuatan dalam kebijaksanaan, bukan dalam sentimen ketakburan atau keangkuhan. Menjaga keharmonian ini penting agar dakwah Islamiah dapat disebarkan dalam suasana harmoni sekaligus memperlihatkan Islam sebagai agama yang harmoni dan penuh kasih sayang. Kedudukan Tuan Yang Terutama Yang di-Pertua Negeri sebagai ketua negeri dan agama sekaligus telah memartabatkan dan meninggikan syiar Islam di negeri Sarawak. Allah *subhanahu wata'ala* berfirman dalam Surah al-Nisa', ayat 29:

يَا أَيُّهَا الَّذِينَ ءَامَنُوا لَا تَأْكُلُوا أَمْوَالَكُمْ بَيْنَكُمْ بِالْبُطْلِ إِلَّا أَنْ تَكُونَ تِجَارَةً  
عَنْ تَرَاضٍ مِّنْكُمْ ۚ وَلَا تَقْتُلُوا أَنْفُسَكُمْ ۚ إِنَّ اللَّهَ كَانَ بِكُمْ رَحِيمًا

**Maksudnya:** *Wahai orang yang beriman, Janganlah kamu makan (gunakan) harta-harta kamu sesama kamu dengan jalan yang salah (tipu, judi dan sebagainya), kecuali dengan jalan perniagaan yang dilakukan secara suka sama suka di antara kamu, dan janganlah kamu berbunuh-bunuhan sesama sendiri. Sesungguhnya Allah sentiasa Mengasihani kamu.*

Lantaran itu, terbukti sudah peranan institusi Tuan Yang Terutama Yang di-Pertua Negeri sangat penting dalam memastikan Islam itu tetap dijulang di negeri kita. Dalam erti kata lain, siapa yang merendah-rendahkan pemimpin yang menjadi simbol kepada syiar Islam, secara tidak langsung ia merendahkan kedudukan Islam dalam Perlembagaan Negara.

Sesungguhnya, menjaga keharmonian dan mengikat erat tali perpaduan ini, adalah tanggungjawab kita bersama dan ia merupakan sebahagian rasa syukur kepada Allah *subhanahu wata'ala* terhadap nikmat keamanan ini. Dalam suasana yang harmoni dan bersatu padu, dakwah Islamiah akan lebih mudah terlaksana, kedudukan Tuan Yang Terutama Yang di-Pertua Negeri sebagai simbol syiar Islam dihormati sama ada oleh mereka yang Islam dan bukan Islam dan akhirnya menterjemahkan Islam itu sebagai rahmat ke seluruh alam.

### **Kaum Muslimin yang dirahmati Allah,**

Pengajaran atau ibrah yang boleh kita ambil daripada khutbah pada hari ini, antaranya ialah :

**Pertama:** Sifat dan nilai keadilan serta kebijaksanaan institusi Tuan Yang Terutama Yang di-Pertua Negeri, akan mencorak pembangunan ummah dan keharmonian negeri serta memacu pembangunan dan kemajuan yang lebih hebat, diredai dan diberkati di sisi Allah *subhanahu wata'ala*

**Kedua:** Institusi Tuan Yang Terutama Yang di-Pertua Negeri adalah umpama payung kepada rakyat dalam memperkukuhkan keharmonian dan kesejahteraan rakyat.

**Ketiga:** Sebagai rakyat juga, kita bertanggungjawab menyerahkan taat setia kita kepada Tuan Yang Terutama Yang di-Pertua Negeri agar pentadbiran dan pemerintahan Tuan Yang Terutama Yang di-Pertua Negeri dapat dijalankan dengan lancar dan menyeluruh kepada seluruh rakyat.

Akhirnya, marilah kita bersama-sama menghayati firman Allah *subhanahu wata'ala* di dalam surah al-Anfal, ayat 63:

أَعُوذُ بِاللَّهِ مِنَ الشَّيْطَانِ الرَّجِيمِ  
وَأَلَّفَ بَيْنَ قُلُوبِهِمْ ۚ لَوْ أَنفَقْتَ مَا فِي الْأَرْضِ جَمِيعًا مَّا أَلَّفْتَ بَيْنَ قُلُوبِهِمْ  
وَلَكِنَّ اللَّهَ أَلَّفَ بَيْنَهُمْ ۚ إِنَّهُ عَزِيزٌ حَكِيمٌ

**Maksudnya:** *Dan (Dia lah) yang menyatu-padukan di antara hati mereka (yang beriman itu). Kalaulah engkau belanjakan segala (harta benda) yang ada di bumi, nescaya engkau tidak dapat juga menyatu-padukan di antara hati mereka, akan tetapi Allah telah menyatu-padukan di antara (hati) mereka. Sesungguhnya Ia Maha Kuasa, lagi Maha Bijaksana.*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ  
وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي  
هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،  
وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.

## KHUTBAH JUMAAT KEDUA

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ  
وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ،  
فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ.

### **Kaum Muslimin yang dirahmati Allah,**

Marilah kita bersama-sama sentiasa mematuhi garis panduan dan Prosedur Operasi Standard (SOP) pencegahan penularan wabak COVID-19 yang telah dikeluarkan oleh pihak berkuasa. Bagi yang belum menerima vaksin, dianjurkan agar segera mendapatkannya sebagai ikhtiar untuk menyekat penularan wabak berbahaya ini dalam masyarakat. Pada masa yang sama, teruskanlah memohon keampunan dan bermunajat kepada Allah subhanahu wata'ala agar diangkat segera wabak ini daripada kita.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا  
تَسْلِيمًا ٥٦

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ  
وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.



Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia dan di akhirat.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah, Ya Dzal Jalali Wal Ikram! Kabulkanlah doa kami. Terimalah segala amal ibadah dan ketaatan kami kepada-Mu. Ya Allah, kukuhkanlah perpaduan dan kesatuan hati kami. Limpahkanlah ke atas kami nikmat kesihatan dan keafiatan. Kurniakanlah kesembuhan kepada mereka yang diuji dengan penyakit-penyakit dan bebaskanlah negara kami daripada segala perkara yang tidak diingini dan wabak penyakit, khususnya wabak COVID 19. Menangkanlah kami dalam memerangnya.

اللَّهُمَّ اشْفِنَا وَاشْفِ مَرْضَانَا وَمَرْضَى الْمُسْلِمِينَ، اللَّهُمَّ اجْعَلْهُ طَهُورًا لَّهُمْ،  
وَارْفَعْ مَنْزِلَتَهُمْ، وَأَبْدِلْهُمْ مِنْ بَعْدِ الْمَرَضِ صِحَّةً، وَمِنْ بَعْدِ الْبَلَاءِ عَافِيَةً.  
اللَّهُمَّ ارْحَمْ مَوْتَانَا وَمَوْتَى الْمُسْلِمِينَ، اللَّهُمَّ اغْفِرْ لَهُمْ وَارْحَمْهُمْ، وَعَافِهِمْ  
وَاعْفُ عَنْهُمْ. رَبَّنَا أَنْتَ فِي الدُّنْيَا حَسَنَةٌ وَفِي الْآخِرَةِ حَسَنَةٌ وَقِنَا عَذَابَ  
النَّارِ. أَمِينَ، أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ عَنِ  
الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ  
يَذْكُرْكُمْ. وَاشْكُرُوهُ عَلَىٰ نِعْمِهِ يَزِدْكُمْ. وَاسْأَلُوهُ مِنْ فَضْلِهِ يُعْطِكُمْ. وَلَذِكْرُ  
اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.